

Sinaakktissatut atugassiinerit piumasaqaatillu makku aallaavigalugit Maniitsup eqqaani erngup nukissiornermik tunngaveqarluni aluminiumik suliniummut tunngatillugu Alcoa Inc.-imik oqaloqatiginninnermik nangitsinissamut Naalakkersuisut pisinnaatitaanissaat pillugu

Inatsisartunit aalajangiuussutissamut siunnersuut:

1. **Piginnittuuneq:** Naalakkersuisut *akuersissuteqarnermik ilusiviusoq* aallaavigalugu Maniitsup eqqaani aluminiumik suliniummik suliaqaqqissapput.

2. **Sanaartornermut aningaasaliinerit:** "Kalaallit Nunaanni sulianik angisoorsuarnik inuussutissarsiutitigut suliniutit piviusunngortinnissaannut sinaakktissatut piumasaqaatit pillugit nassuiaat"-mi sanaartornissamik aningaasaliissutitut nassuiarneqartunik Qeqqata Kommunianik suleqateqarlutik Naalakkersuisut aningaasaliissutissanik pissarsiniassasut.

3. **Erngup nukissiornermut inatsisaasumik allannguineq:** UPA 2013-imi erngup nukissiornermik inatsimmut allannguutissatut siunnersuut Naalakkersuisut saqqummiutissavaat, tassani akuersissuteqarnermik piginnittumut maannakkut ukiunut 40-nut taarsiullugu akuersissuteqarfiusup siulliup ukiut 60-it tikillugit sivissuseqartitsilersoqarlunilu sulii ukiunik 20-nik sivitsuisinnaasoqassalluni.

4. **Tamanit atugaasutut pilersuisoqarfimmut sinneqartoorutaasumik innaallagissamik tunisineq:** Aluminiumik suliniummut atatillugu erngup nukissiorfiit ingerlanneqarnerinut akuersissummi tamanit atugaasutut pilersuisoqarfimmut innaallagissamik tunisineq akuersissummik pigisaqartumut peqqussutaasinnaanginnera aalajangersarneqarsinnaavoq, taamaallaalli nammineq piumassuserisaq naapertorlugu isumaqatigiissutigineqarsinnaalluni.

5. **Akilaartarnermik inatsisilianik aamma erngup nukissiornermut inatsimmik allannguinerit:** Aatsitassarsiornermut inatsit naapertorlugu akuersissutinut tunniunneqartunut maannakkut pisartutuulli assingusumik erngup nukissiornermut inatsit naapertorlugu akuersissutinut tunniunneqartuni ingerlatseqatigiiffinnut akileraarusiisarnermik taarsiisussamik minnerpaamik assingusumik annertussuseqartitamik akiliuteqartarnerup aalajangersaavigisinnaanissaa siunertarlugu periarfissiinarlutik akilaartarnermik inatsisilianik aamma erngup nukissiornermut inatsimmik allannguuteqarnissamut Naalakkersuisut UPA 2013-imi siunnersuummik saqqummiussaqaassapput. Suliniut sanaartornerup nalaani naqissusiinikkut akitsuusersorneqassanngilaq. (Inuussutissarsiornermut Aatsitassaqarnermullu Naalakkersuisuni ilaasortaq)

Akissuteqaat

(Inuussutissarsiornermut Aatsitassanullu Naalakkersuisoq)

Aappassaanneerinnineq

Naalakkersuisut sinnerlugit Ataatsimiititaliap suliaqarneranut qutsavigaara.

Ataatsimiititaliap isumaqatigiittup atugassarititaasussanut sinaakktissat taakkua akuerineqarnissaat inassutigigaat, nuannaarutigegalugu Naalakkersuisut paasivaat, tassami Kalaallit Nunaata oqaluttuarisaanerani suliaat annerpaat ilaata piviusunngortinneqarnissaa pillugu isumaqatiginninniarnermik ingerlateqqinneqarnissaannut isumaqatiginninniarnissamut piginnaatitaaneq tassani pineqarpoq. Suliassaq piviusunngortinneqassappat tamanna Kalaallit Nunaannut aammalu inuiannut kalaallinut pingaaruteqartorujussuusussaavoq, taamaattumik partiit akimorlugit atituumik tapersiinissaq pingaaruteqartorujussuuvoq.

Ataatsimiititaliap atugassarititaasussanut ataasiakkaanut oqaaseqaatai maluginiarneqarput, aammalu isumaqatiginninniarnermik ingerlaqqinnerannut atatillugu isumaliutersuutini ilaatinneqassallutik.

Taamatut annikitsunik naatsumillu oqaaseqarlunga aalajangiiffigisassatut siunnersuut saqqummiunneqartoq Inatsisartut akuerissagaat inassutigissavara.